



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym TAPAK 8

Opposition teloktep nung tongtiji
Congress asütsüla: Jairam Ramesh

Aryna Sabalenka-i
Australian Open 2023 kokogo



VOL. XX NO. 107 (ADOK 107) DIMAPUR AMUNGNÜ (SUNDAY) AENJETI (JANUARY) 29, 2023 ₹ 5.00

HML company-i Nagaland nung rubber aser süngjanglijang shishilembatsü

Dimapur, January 28, 2023 (TYO): Kerala nung amenoka aliba company- Harrison Malayalam Limited (HML) ajanga Nagaland nung rubber shishilembatsü atema lenmang bushiteper.

HML-i Nagaland nung rubber lu ayimertem asoshi shishilembatsü lenmang bushir.

HML-i rubber dak alia Nagaland nung tsünütetba jiro amala süngjangtem shishilembatsü sentong lir ta Head- Rubber Business (vice president) Biju Panicker-i ashi.

HML nungi züngsem pezü teshimtet telok ka Nagaland nung arua rubber aser süngjanglijangtem shishilembatsü asoshi lenmangtem asadangtsü arua lir.

HML-i ribbed smoked sheets, Indian standard natural rubber etc dena processed rubber shishilembangtsü lenmang bushiteper ta Honibarnü Hotel Acacia nung osangbener den jembidang Panicker-i ashi.

"Onoki aluyimertem dang nungi oset alizütsü. Aluyimertemi scientific aser progressive methods amshia rubber tajungtiba adokdaksütsü

asere ibaji yokdoktsü atema shishilembadak ka lapoktsütsü onoki lenmang bushir. Iba ajanga parnoki küm piyong sen aazütsü" ta paisa metetdaksü.

"Nagaland nung rubber lu ayimertem asoshi shishilembadak ka angutsü imlar. Onoki natural rubber replanting, upkeep, harvesting, processing aser marketing nung yariteptsü" ta Panicker-isa shisem.

"Nagaland nung rubber lu ayimba ya kanga tajung ama repranger kechiyong 86 lakh hectares tashi nung rubber anepaluar" ta paisa ashi.

HML-i Nagaland nung rubber maparen inyaksü atema TOKA Multi-Purpose Co-Operative Society den tesentaktep yanglu lir.

TOKA Multi-Purpose Co-Operative Society nung Managing Director Kathi Chishi ajanga Nagaland-i HML anir aru.

HML ya plantation industry nung kanga dang tongtipang telok ka lir. HML ya south India nung süngojok yangluba company tulutiba rongnung tanabuba lir aser India nung natural rubber teimtiba yangluba company lir.

NE nung tensa tajungba kümogo: Lt Gen Kalita

Kolkata, January 28, 2023 (Agencies): Northeast nung tesüiba küm ishika tsüngda security tensa tajungba kümogo aser NE state kübok tesem kar nungi AFSPA agienba ajanga Army maparen nung tetsükdaksü mangur, ta Lt General Rana Pratap Kalita-i ashi.

Lt General Rana ya Eastern Command nung General Officer Commanding-in-Chief lir.

Eastern tsütsü Army-i yimtsüngtem nungi nisungtem tangalen maotsü atema model villages kümdaksü, ta pai ashi.

"Tesüiba küm ishika tsüngda north-east ajungalen tensa tajungba kümogo. Assam, Nagaland aser Manipur kübok district kar nung Armed Forces (Special Powers) Act agienogo. AFSPA agienba ya asaa masü saka iba ya sendaktepa alirtem

den kanga junga jembitepba sülen ang agien" ta Lt General Rana-isa metetdaksü.

AFSPA agienba ajanga Army maparen nung tetsükdaksü majurur, ta paisa shisem.

Yaküm union budget nung model villages maparen indang metetdaksüogo. Iba ya yimtsüng nung alirtem tangalen mapa inyaki aoba anendaksütsü atema inyaker, ta paisa ashi.

Model villages nung shisaliok, temang anepalubaren jenjang ajungketba den tepok mesütsü atema lenmang balala sayur, ta Lt Gen Kalita-isa ashi.

"Kaho (Arunachal Pradesh) kübok yimtsüng ana-asep nung mapa tenzüko. Eastern theatre nung onoki yimtsüng 130 jangjaogo aser Ladakh o Uttarakhand nunga yimtsüng 130 shi jangjaogo" ta paisa metetdaksü.

Assam CM-i 'appointment letters' 1200 tema agütsü

Guwahati, January 28, 2023 (Agencies): Honibarnü Assam Chief Minister Himanta Biswa Sarma-i sorkar department balala nung nisung 1,200 tema nem appointment letters agütsüogo.

Tanü sorkar mapa angurtem rongnung 1988 nungi police mapa inyakdang taküm bendanga agütsü kibongtem nem 'compassionate grounds' tenüng agütsürtem dena lir.

"Health & Family Welfare aser Home & Political department tem nung nisung

1,208 mapa nung shimokba indang appointment letters pelashishia agütsü. Tang tashi nung nisung 41,710 nem mapa agütsüogo aser onoki nisung lakh 1 nem sorkar mapa agütsütsü alizüng atongtsü atema inyaker" ta CM Sarma-i ashi.

Mapa teinyakdak nung tepsetba police kibong shia nem mapa agütsütsü atema sorkari meranga inyaker. 1996 nungi 2005 tashi Assam nung kin ajak indang telungpur telok liasü, ta paisa ashi.

Foothills Road nung Doyang apu meshitetogo



January 28, 2023 nü Governor's Camp, Liphanyan nung Doyang apu meshiteta sarasadem dang agiba noksa ka angur.

Dimapur, January 28, 2023 (TYO): Nagaland nung tang teyangludak Foothill Road nung kanga dang tongtipang Doyang apu January 28, 2023 nü meshitetogo.

Iba apu ya Governor's Camp, Liphanyan nung Doyang ayong temdanga yanglu aser Honibarnü sentong ka nung Christian Forum Dimapur Chairman Rev Moses Murry-i Nagaland nung nübortem asoshi meshitettsüogo.

Iba apu ya January 6, 2023 nü Union Home Minister Amit

Shah-i online ajanga lapokja liasü.

Tanü iba apu meshitetba sentong nung Naga kin aika nungi nisungtem arua shilem agiogo. Iba sentong nung CNTC, ENPO, Young Naga Action Committee on Foothills Road aser contractor M/S Phukhato Shohe & sons nungi teshimtet nübotemi o jemb.

August 14, 2013 nü Naga nungeri Tsüngrem dang sarasadema aser lumia Nagaland Foothills Road Co-Ordination Committee

(NFHRCC) ajanga Foothill Road mapatong tenzüka liasü.

Wokha district kübok Doyang ayong temdanga yangluba apu ya M/S Pukhato Shohe & Sons ajanga yanglu. Iba apu ta 134.8 meters talang lir.

NFHRCC ya 2013 küm Naga nunger kin hoho 12 kübok tentetba liasü. Naga nunger kin 12 ji Ao, Chang, Konyak, Khamniungan, Kuki, Lotha, Phom, Rengma, Sangtam, Sumi, Yimkhiung aser Zeliang nunger lir.

NDPP-i Kohima Town & urban constituency 4 BJP nem lemzütsür

Kohima, January 28, 2023 (TYO): Nationalist Democratic Progressive Party (NDPP) aser Bharatiya Janata Party (BJP) tsüngda tesentaktep akangshio go aser ibaji NDPP-i 9-Kohima Town A/C dena jila constituency pezü BJP nem agütsütsü mulungba lir.

BJP-i Kohima district nung Assembly Constituency 6 nungi ka- 9 Kohima Town aser 38-Wokha, 46-Mon Town o 54-Tuensang Sadar-II Constituency tem meshiba Chief Minister Neiphiu Rio-i mulungogo ta NDPP o BJP osang ajanga angazüker.

2018 küm NDPP aser BJP tesentaktep yanglur toktepdang NDPP-i Kohima district nung menden ajak agi saka taküm election nungbo BJP Kohima district nung aser talisa 15-Southern Angami-II Assembly Constituency nung parnok junga amentetba osang metetdaksü. Iba atema parnoki BJP Nagaland President Temjen Imna Along dangi shidi ka zülü aser

Kohima nung BJP züngsemtemi taoba NPF MLA Kropol Vitsu pusema aser pa

nem BJP ticket agüjang ta takhangba agüja January 23 nungi BJP State Headquarters kima nung lungkak aita aru.

Lennirtemi parnoki ahangba agizütsü ta nangzüka sülen BJP Kohima district lennirtem aser Kropol Vitsu pusemertemi tanep nungi lungkak aitba anenogo.

BJP high command-ia Kohima district nung menden ka aginür kechiyong iba ya state yimtiba lir. High command-isa urban constituencies asem aginür, ta BJP osang ajanga angazüker.

Iba ajanga NDPP lennir Rio-i BJP central lennirtem den menden lemsatepba onük jembia arur aser BJP-i meshiba ama urban constituencies 4 agütsütsü mulungogo.

Kohima district BJP osang ajanga ashiba agi parnok nem 9-Kohima Town A/C lemzütsü aser iba constituency nung NDPP MLA & Advisor Dr Neikiesalie Kire-i BJP candidate ama tokteptsü jaok.

Ajisüaka, Kohima BJP unit-i ashiba agi parnoki züngsem 3000 tashi aniokogo aser 15-Southern Angami-II menden

dang aginür ta metetdaksü.

Tang iba menden nung NDPP MLA & Youth Resources and Sports Advisor Zale Neikha lir.

Dr Kire pusemertemia iba lemtet ya shitak ta shiogo. Pai BJP züngsem akümsü jaokba magizüker aser pa mesüzütsü atema maneni jembidar ta parnokisa ashi.

Asüng tashi nung NDPP aser BJP ajanga Kohima menden atema tatembang lemtet agitsü ta osang ajanga ashi.

2018 elections nung BJP-i 38 Wokha menden lemzüker saka NPF candidate Dr Chumben Murry-i takok angu saka BJP candidate Dr T Myingthungo Lotha tasembuba jenjang nung ang adok.

46 Mon Town menden nung NPF candidate N Thongwang Konyak-i NDPP candidate Y. Mankhao Konyak madak takok angu aser 54 Tuensang Sadar-II nung NPF Kejong Chang-i takok angu aser BJP candidate Rhakila-i tasembuba jenjang ang angu.

Ajisüaka, yaküm April ita par asem den külemi MLA 18-i NDPP den loktep.

Duncan bosti colony-i temerektiba kiyong tetoktepba akok



Kiyong temerektiba toktepba nung takok anguba kiyong nungi züngsemtem den Dimapur Municipal Council, Administrator Manpai Phom tangokba noksa nung angur.

Dimapur, Aenjeti/January 28 (TYO): Dimapur Municipal Council, Administrator Manpai Phom-i, Dimapur municipal telongtet nung anogo shia jana bendenba kanga ajema kümogo, koba anogo nung tonne 115 liasü, ta ashi.

Dimapur Town Hall nung Honibarnü kiyong temerektiba tetoktepba atema sempet agütsüba sentong nung o jembiba mapang Manpai-i, Dimapur nung jana bendenba ya 2022 küm November ita tashi nung anogoshia tone 74 dang kümer liasü, ta ashi.

Municipal-i DMC jana bendenba tesem nung organic janatem mol (manure) küm daksütsü atema composting unit ka amenoktsü sentong, lir kechiyong jana shilem 50 bo organic lir, ta Manpai-i ashi. Pai ashiba agi, waste management ya nisungshia aser kibongshia nungi tenzüksü nüngdaker. Municipal body ya waste management aser sanitation atema dang masü saka jila terenlok aser tebur junga yanglutsü atema lir, ta pai ashi.

Maneni pai kiyong balala ketdangsürtem dang Dimapur yimti merek mereka

kümdaksütsü atema parnok tebilembatem lemsateptsü ayongzüka liasü.

Kiyong temerektiba tetoktepba kübok colony tulutem rongnung Duncan bosti colony mezüngbuba aser iba sülen Naga gaon colony aser Lengrijan colony tanabuba aser tasembuba jenjang nung liasü. Kiyong tilatem rongnung Riverbelt colony mezüngbuba aser tanabuba aser tasembuba jenjang nung Niu colony aser Aokong colony na liasü.

Tetoktepba nung takok angurtem nem senpet den kuli kaket tajung agütsüogo.

Assam Rifles-i Heraka lokti nem teyari agütsü

Dimapur, Aenjeti/January 28 (TYO): HQ IGAR (North) kübok Assam Rifles Jalukie Battalion-i, Peren District kübok Jalukie B Village nung January 28 nü lokti nung nütsüng agi ajema aliba Heraka lokti nem tenüngdakba osettem agüja liasü.

Tenüngdakba osettsüet balala agütsüba den yimdaklirtem nem education

asere merekmejua alitsü koda tongtibang iba indang tangazükba agütsü. Parnok nemsas asükwa mapang koda merekmejua alitsü aser temang koda anepalutsü iba indang tangazükba agütsü.

Jalukie B Village Heraka Council Chairman aser züngsemtemi, sensakser aser nüngdaka aliba nüburtem nem teyari agütsüba atema Assam Rifles dang kanga pelaba

lemsatepa liasü.

Telungpuri timtem agütsüba North Eastern States tem nung yimjung aser tesunep bener arutsütsü atema dang inyakba masü saka Assam Rifles-i, sentoker kinük nung aliba nüburtem nem takokba tashi teyari agüja arudar, ajita asünungdang lokti ajunga liromedema ajungkettetsü aser nüngdaka aliba purtem anepalutetsü.

Frolic Club silver Jubilee mungogo



Alakteta jaoker, Chakhroma Public Organization tri Zhatto Kimho tangokba noksa nung angur.

Dimapur, Aenjeti/January 28 (TYO): Frolic Club Silver Jubilee mung January 28 nü Local ground, Medziphema nung mungogo. Iba club ya 1998 küm tenzük aser parnok nükjidongji telongjem atema inyaksü aser ajak nem kasa maangka agütsütsü asoshi lir. Club omeji "Achieve Greater Heights" lir.

Honibarnü Silver Jubilee benjung sentong ya Rev. H Minlen-i maotsü aser Chakhroma Public Organization tir Zhatto Kimho alakteta jaoker liasü.

Sentong nung o jembiba mapang alakteta jaoker-i Medziphema nung aliba nüburtem dang Tribalism toktsütsü aser iba tesem loktilibaren aser rongsenketzüng ajungkettsü atema longjemer inyaksü ayongzüka liasü.

Medziphema kanga meyilongi renloka aoer ta shia pai, nüburtem dang tebilemdangba ulushitsü aser infrastructure nung sen intoktsü ajungshi. Paisa, ali kiburtem dang terenlok pelashishia

agizüksü aser parnok shilem agitsü ajungshi.

Sentong nungsa Rev. Megovoto Kuotsu-i, Jubilee Souvenir bendanga agüja sarasademtsü aser ashiba agi, telongjem aser kati ka akümtsübutep aliba ajanga Frolic club iba alizüng tongtetogo ta ashi. Paisa, iba tashitsü ya SHG, Clubs, NGO temi angazükba benshitsü nüngdaker, kechiyong item loktitem timba lemdanger aliba dang angur, ta ashi.

Maneni sentong nung Acü Seyie (Medziphema Village Council) aser Akhoto Miasalhou (President, Medziphema Town Mechu Krotho) natia o tatsütsü jembia liasü aser Vimeno Dolie, Neilhoukholie Kuotsu aser Neitsolewe Koza nungeri ken aten.

Club tenteter parnoki lokti ajungkettsü atema aser teyari maparen balala inyaka arudar. Club-isa 2011 küm nungi Football asayamung ayongzüka asaya arudar aser 2021 küm nungi asayamung nung Volleyball dena bendenlokogo.



Unit aser yimtsüngtem ajak dangi tsüngdong oa semdanga jajaba den phukümer nüburtem den shisalemsa sendentem amenba sülen, 24 Angetyongpang Assembly Constituency nungi ajaki kangadang akümtsüba alisang, taoba candidate Shri. Sashimar Jamir-ia nüburtemi phuküma nungitsang Shri. S. Maongkaba Ozükum takokba ajak nung nungita yaritsü sangdongogo. Tejangja India senso tajung aser candidate ka ama Shri. S.Maongkaba Ozükum-i linük temzüng temelaba nung ajemdaker bangdak yimli tasen ka bener arutsü terenemba lir. Nübur telemtetba tashi nung ajemdaker yimtenyimli yangerba ochi tejangraba nung ajemdaker aruya aliba election nung tokteptsü alisang Shri. S. Maongkaba Ozükum den Shri. Sashimar Jamir aser pa phukümeritemi teka amtepa longjemba sülen tangokba noksatem angur.

ATMA Kobulong-i mersü tsünütsüba yimya sayu



Dimapur, Aenjeti/January 28 (TYO): ATMA, Kobulong block Mokokchung-i, January 28 nü Mopungchuket yimtsüng kübok Molongkong tesem nung mersü tajungba tsünütetsü atema inyakyimtem sayuogo.

Iba sentong nung shisalen sayurji Block Technology Manager, ATMA C. Amongla Jamir liasü aser lai nursery bed renemba, ali renemba, mol (manures) amshiba yimya, sowing time transplanting, intercultural operation, ozüsangnu aser tashidak anepaluba yimya aser mersü

aongba indang tangazükba agüja liasü.

Laisa aluyimertem dang organic alu ayimtsü ajungshi. Maneni lai Neemoil, pheromone trap aser yellow sticky trap amshiba yimya sayu. Iba sülen nursery bed renemba yimya aser mersü tsünüba mapang tawa koma ayutsüla iba indang aluyimertem dang inyak sayua liasü.

Sentong tatemi aluyimertem nem metsü aser Neemoil agütsü. Iba sentong nung aluyimer 11-i shilem agia liasü.

IAF indang tayimtsü ana tsükok; pilot ana kümzük aser ka asü



January 28 2023 nü Madhya Pradesh kübok Morena district nung tsükokba Mirage 2000 tayimtsü teraksa noksa nung angur.

New Delhi, January 28 (Agencies): Honibarnep Indian Air Force (IAF) indang raraba tayimtsü ana Gwalior Air Base nungi apusoba sülen ka Rajasthan kübok Bharatpur nung tsükok aser ka Madhya Pradesh kübok Morena nung tsükok; iba lendong nung pilot ana kümzük aser ka asü.

Mirage 2000 tayimtsü aser Sukhoi 30 (Su-30 MKI) tayimtsü naji antüing nung tsüktep asütsüa akok, kechiyong tayimtsü anapronglaji kasa mapang nungsa tsükok; state balala nung tsükokyonga tayimtsü ana tsükokba tesemji kanga anasatapa lir, ta osang angazüker.

Ajisüaka Court of Inquiry ajanga dang kuli tejanga metettsü, ta IAF-i metetdaksü.

Morena nung tsükokba Mirage 2000 tayimtsü anisang pilot, Wing Commander Hanumanth Rao Sarathi iba lendong nungji asü aser Bharatpur nung tsükokba Su-30 MKI tayimtsü nung mena aliba pilot anajibo tayimtsü nungjagi 'eject' süa kümzük.

"Tanep IAF indang raraba tayimtsü ana Gwalior anasa tsükok. Tayimtsü anaji training mission nung liasü. Pilot asem rongnung ka kanga mejungi yirua asü," ta IAF-i metetdaksü.

Osangbener den jembidang Morena District Collector, Ankit Asthana-i, tayimtsü anaprongji district kübok Pahargarh area nung tsükok aser tayimtsü teraksa karbo Madhya Pradesh den arrtsülen Bharatpur area

nung tsük, ta metetdaksü.

Pilot anabo parachute nung alua anguba sülen tenaprongji IAF chopper ka ajanga Gwalior-i treatment agitsü atema anir ao.

Dassault Aviation-i yangluba Mirage 2000 ya France nung engine ka dang aketba fourth-generation fighter jet lir aser India nung iba tayimtsü 50 lir. Tayimtsü ajakji 1985 küm nungi tenzuka mapang balala nung alizükba lir. 2010 küm nungi tenzuka iba tayimtsü ya ponguben tsükokogo.

Russia-i yangluba aser India's Hindustan Aeronautics Limited license kübok yangluba Su-30 MKI tayimtsü ya engine ana aketba raraba tayimtsü lir. Tang IAF ket nung iba tayimtsü 260 lir. 2010 küm nungi tenzuka iba tayimtsü 10 shi tsükokogo.

FTII Students' Association-i campus nung BBC Documentary saya

New Delhi, January 28 (Agencies): Film and Television Institute of India (FTII) students' association-i institute indang campus telung nung 2002 küm Gujarat nung rara dak sendakba BBC documentary sayaogo, ta Honibarnü parnoki metetdaksü.

"26/01/23 anogo nung onoki FTII nung sorkari nokdanga aliba BBC documentary 'The Modi Question' sayaogo," ta FTII Students' Association-i metetdaksü.

Taoba hopta Centre sorkari

social media platforms Twitter aser YouTube dang documentary "India: The Modi Question" indang links agienang, ta tuyua liasü.

FTII students' association-i sangdong ka ajanga, akhidang nungi literature aser music nokdanga aser tawa media nokdanga ya chirepba loktiliba temaitsü ka lir, ta ashi.

"Asenoki shimba lenirtemi ibaji repringhitsü atema agizüksüla liasü. Ajisüaka parnoki (sorkari) kanga kera, iba ya osang ya tai ta dang sangdong. Langkaka atangji

repringtsü atema ibaji nokdangtsüla, ta parnoki (sorkari) metettsüla," ta kasa sangdong nung shia lir.

FTII Registrar, Sayyid Rabeehashmi-i, "Kaketshirtem telok kati iba documentary sayaogo ta osang angazükogo. Ibaji onoki bushisingdangtsü," ta metetdaksü.

Tesüiba anogo ishika tsüingda Jawaharlal Nehru University, Delhi University aser Ambedkar University densema linük nung university ishika nung iba BBC documentary sayatsü meranga liasü saka nokdangtet.

India-i taoba mapang aibelen-tem metongshidar: PM Modi

New Delhi, January 28 (Agencies): Honibarnü Ato kilonser, Narendra Modi-i, sorkari tamalen sendokba lokti ajak nem tashi agütsütsü atema inyaker, ta metetdaksü.

Rajasthan kübok Bhilwara district nung Lord Shri Devnarayan indang benjung ka nung adenba sülen Malasari Dungri yimdak lokti den jembidang pai, tangbo alimai India dak teimla akar aser India-i alima dang tashi sayutetogo, ta metetdaksü.

Tanübo India ya alima sabang nung lir aser tanga linüktem dak metaloka aliba kanga ajema kümдар, ta paisa metetdaksü.

India nungeri nüchiso atema raraba mapang nung Gurjar nungertemi shilem tajung agiba atema tenüngsang agüja Modi-i, temsüa liaka puti otsü nung aika mezüngokba ya linük atema tia maka, ta ashi.

Ajisüaka India tasenbai tesüiba mapang aibelen balala metongshidar, ta paisa shisem.

"India nunger tangatetba raksatsütsü atema aiben merangogo saka kecha tashi agia aji makok. India ya alinük ka dang masü saka sobaliba, tesünep aser tashi aliba linük lir," ta pai ashi.

"Linük telongjem raksatsütsüsa alibatem nungi nüburtem aienshitsüla," ta pai ashi.

Tesüiba küm 8-9 tsüingda

linüki taoba mapang sendokbapurtem nem tashi agütsütsü atema inyaka aruogo; maongka mangurtem nem maongka agütsütsü nükjidong nung sorkari inyaker," ta Ato kilonserisa metetdaksü.

"Asenoki asen senmang atema nüma tangdi, akhidang alartem melungsentsü indokdi aser linük atema asen teinyaktsü shilem bilemtetdi," ta pai ayongzük.

Centre sorkar indang schemes aser programmes balala metetdaksüandang Modi-i, "Tamalenbo sensakertemi rations atema shisabulua liasü saka tangbo parnoki angati rations peria angur. Ayushman Bharat ajanga medical treatment atema shisabuluba anenogo," ta ashi.

"Tesüiba mapang nungbo banking transactions ya nisung kar atema dang liasü, ajisüaka tanübo nisung ajak atema banks kishi lapoktsüogo, pipe ajanga kibong crore 11 nung tzi angur aser PM Kisan Samman Nidhi ajanga aluyimertem tajangzük angur," ta paisa metetdaksü.

PM Kisan Kisan Samman Nidhi scheme kübok Rajasthan nunga aluyimertem nem sen crore 15,000 agütsüogo, ta pai metetdaksü.

Kasa sentong nungji BJP Rajasthan Tir Satish Poonia, Union Minister of State Arjun Ram Meghwal aser party lenirtem aika dena liasü.

Opposition teloktep nung tongtiji Congress asütsüla: Jairam Ramesh

Awantipora, January 28 (Agencies): 2024 küm Lok Sabha election nung BJP anema tokteptsü atema opposition teloktep kechi tentetdir tentetaka iba nungji Congress tongti asütsüla, kechiyong linük tesem ajungalen aliba yimtenren party ji Congress dang lir, ta Honibarnü party lenir, Jairam Ramesh-i metetdaksü.

Congress Party general secretary, Ramesh-isa, 2029 küm Lok Sabha election nungbo Congress-i state ajak nung tangar shinga den-a meloktepi tokteptsü atema state ajak nung renema alitsüla, ta ashi.

Interview ka nung jembidang Ramesh-i, paibo takümsa Gujarat kübok Porbandar nungi Arunachal Pradesh kübok Parshuram Kund tashi yatra ka ayongzuka agitsüla ta benokogo, ajisüaka party-i dang iba telemtetbaji agitsü, ta ashi.

Tang Congress-i Tamil Nadu kübok Kanyakumari nungi Kashmir kübok Srinagar tashi 'Bharat Jodo Yatra' agiba ya Ramesh aser Digvijaya Singh nati mezüng apitetba liasü.

Opposition teloktep nung Congress ya tongti asütsüla asü?, ta asüingdanga langzüdang Jairam Ramesh-i, "Atangji ni yamaji bilemer, kechiyong (BJP sülenbo) tanü-a national party ji onok dang lir. Onok state aika nung tashi (sorkar) malitsüa akok, saka yimtsüing ajak, mohalla ajak, block ajak, jila aser yimti ajak nung nenoki Congress nung inyakertem angutsü, Congress pusemba kibongtem angutsü," ta ashi.

"Ozü sorkar aliba states mesüra onoki anguba votes shilem kija nungi party asadangbaji tamashi. Congress indang tangatetbaji tiyongtsü. Iba ya Centre-Left party lir. Anungji onok ya tongti. BJP anema toktepedi süra teloktep nung tongtiji Congress asütsüla," ta pai ashi.

Ramesh-i, "Nibo Congress kijai BJP anema toktepner, ajisüaka 2024 küm election nung ibaji tamakoktsü. Kü tangatetba nungbo 2029 küm atema onoki state ajak nung tangar den meloktepi tokteptsü atema renema alitsüla," ta ashi.



January 28, 2023 nü Dharwad nung Forensic Science University amenoktsü atema foundation lung azüngtsüba sentong nung Union Home Minister, Amit Shah, Chief Minister Basavaraj Bommai aser Union Minister Pralhad Joshi nunger adenba noksa nung angur.



TIR YIMYIM YIMOBILEM (EDITORIAL)

DIMAPUR

AMUNGNÜ,

AENJETI 29, 2023

Temulung süa aliba

Alima nung pelapela temulung süa alitsübaji nisung ajak atema kanga tongtibang lir. Aji oda, alima nung temulung süa pelapela malirtemi alimai arua malang aser tasoa meshizük ta kanga nemjema jembir. Aji shitak lir, kechiyong alima nung kangshia aser jashiseta alitsü atema asenok meyok saka Tsüngrem tenüng sanga Pai moatsüba agi tenük sünger asenok pelatepa alitsü asoshi iba limai yok. Ajisüaka, iba lima nung asenok temulung mesüi alitsüsa asenoki bilemer, nükshir aser inyaker. Anogo shia oset tasen tasen adoker aser itemji asenoki alia agitet nungbo iba jagi asenok temulung süa alitsü amato bilemer. Asenoki aiben tangar akaba den asenok rongsen aser libaliro jenjang medemdanger aser kodanga temulung masür. Iba jagi asenok pelaa malir. Aji oda, asenoki asenok akaba rongsen aser asenok taküm libaliro jenjang nungi tepela angutsü meranger. Ajisüaka, asenoki metettsüba kaji, asenoki asen akaba rongsen aser asenok aliba libaliro jenjang nungi anguba tepelajibo teti atema masü. Ashiko, kenübo rongsen ajakji samatsüa akok mesüra rongsen jagiang lendong timtem bener arutsütsüa akok. Aji oda, asenoki chia ajemba chiyongtsü, asenok agiba sübosülemsü aser asenok meyong osettsüsettem nungi anguba tepelajibo manger sangwa nung samatsüba tepela lir. Ajisüaka, koba tia nung lidir liaka, teti dang temulung süa alitsü aser kodanga mesamatsüba tepelajibo Yisu Khrista den tesendaktep akangakanga aliba ajanga dang angutsü. Ibayongji, tenyar Paul-i Filipi 4:11 nung ashir, " ni makamait indang jembir masü, kechiyong kechi tia nungsa ni lidir, iba nungji ni temulung süa alitsü ni angazükogo." Paul ya yimten nung tashi tulu akaba nisung ka liasü. Alima nung pa sünütsüsa jangratema aliba nisungji pa ka liasü. Ajisüaka, item alima tashi, jangratem aser tepela ajakji toktsür pai Yisu Khrista nungi anguba tepela agizükba agiang temulung süa liasü. Paul-i Yisu Khristaji pa taküm nung kibur ta agizükba sülenbo pa tepuokdak aliba mapang aser teloki pa long agi onseta sūdaksütsüsa aliba tensa tia ajak nung pa temulung süa dang liasü. Paisa Filipi 4: 12 nung ashir, " kechi koda ajemzuka alitsü ajia ni metet aser kechi koda jenti kaa alitsü ajia ni metet. Kechisarina nung aser ajak nung anünga alitsü aser ya-a alitsü, jenti kaa alitsü aser anünga alitsü, iba mim oji ni angazükogo." Atangji, Paul taküm ya asenok den medemdangtsü makok. Pa kanga merena aliba nisung ka, anungji pai alima rongsen agia temulung süa linüra litetba jenjang ka nung liasü. Ajisüaka, pai item dakji jangratemtsü mangu. Aji oda, Yisu Khrista akaba ajanga dang pai tashi itdaksür ta pai angatet. Asenoki aiben asenok akaba nung temulung masür, iba jagi tangar akaba dak tenük meremer. Aji oda, kodang asenoki asen nungdak ajak Tsüngremi agütsür ta mangatetter aser mamanger, iba dak nung jagi temulung masüba tenzüker. Asenok pelaa linüra Tsüngremi asenok nem kechi moatsü, idakji temulung asütsüla. Pei akaba nung temulung süa aliba mulungjang nungi tenükmerem shisatsü madoktsü aser asen mulungjang nungi tenükmerem madokra, asenok teti pelaa alitsü. Tenyar Pauli jentia kaa alidang aser yaa alidang, tensa tia ajak nung Tsüngrem dak temulung süa alitsü angatetba miim oji asenokia angatettsü merangdi. Alima rongsen aser jenjang dak asenok temulung süa alitsü merangyonga makoktsü, kechiyong nisunger taginübaji tanen maka aser nisunger tenükshibaji asadangtsü makok. Item nung jagiang nisungtem rongnung rara aser tetsükchitep adoker. Aji oda, asenoki alima tepela nung masü saka Tsüngrem nungi anguba tepela aser temoatsü nung temulung süa litetra, alima nung tasoshia alitsüba temoatsüji aji asütsü. Ibai shisa akariang ajangzüketter.

OLEMSABANG

Nagaland Khrista Asoshi Vs India Hindu Asoshi, Khristan yimsü aser Religio-Political Tayongzükba

K. Temjen Jamir, Yimozülur, Tir Yimyim.

(Yashi adok nungi...)

Aji oda, tanübo Ayodhya nung Hindu nung tekülem ki yanglu tenzüker, state aika nung tanga tamangba yimsü amangertemi Hindu yimsü agizüktsübo yimteni melar, kechiyong ajibo pei kidangi meyipa shilangba den kasa saka Hindu nungbo shinga tangar yimsü agizüka amangtsü memelar. Chia ajemba tsütsü, joko state aika nung nashi shi meyokdaksür, state kar nungbo Yisu-ang satan kumdaksür Hindu nungertemi külemba tsüngremtemang temeshi tsüngrem ama kaketreju nung tanurtem dang sayutsü tenzüker. Aji oda, state aika nung Khristan-tem akhi ama sadema mekülemettsüsa tensa tia ajuruba asenoki anogo shia angashir, angur aser azünger.

Iba ama tensa ka nung, asenok Khristan-tem teinyaktsü khuret aser wadang tuluba akümer. Aji oda, India lima ya Hindu lima küma moudaktsüi Khristan lima ka kümdaktsütsü asoshi asenokia kechi aser koma inyaktüla ta sarasadema bilemdangtsübaji kanga nungdaka kümogo. Atangji, India lima nung Yisu dak mamanger Hindu nungertem amangdaksütsü asoshi RSS, VHP aser BJP teloki Khristan-tem anema inyakba mapatema yimjak nung aija inyakba agia makoktsü. Asenok rongnung shitakba tongpangji Nagaland Khrista asoshi ta asüba o India Hindu asoshi ta asüba na tsüngda raraba tanüla tongpangji lir. Tamangba yimsü tsütsü Hindu nungertemi nisung ajak Hindu kümdaktsütsü merangba, Muslim nungertemi Muslim nung kümdaktsütsü merangba aser Khristan-temi nisung ajak Khristan kümdaktsütsü merangba nungji kecha tai mali, saka taiji kodang yimteni nübertem ajak ozüng agi tamangba yimsü ka dang amangdaksüdir aser kodang ozüng agi senso shinga tamangba yimsü melentsü memeladir aser kodang tamangba yimsü ka agi nübertem achiajem aser sübosülemsü sobaliba dena alendir, itemjiang senso ka temeten anema inyakba mapatem asütsü. Iba tangatetba nung India nung senso shia nem pei kechi yimsü amangner amangtsü asoshi linük temzüngi temeten agüja lir.

Ibayongji, India nung BJP telok dak alaka yimten telok shingaia linük nung tamangba yimsü ka atsünga anitsü aser inyaktsü mebilemer. Aji oda, tamangba yimsü agi anar yimsütsü merangba agi aiben linük nung tamangba yimsü balala amanger teloktem tsüngda mepetmesü adoka azü dena tokshia raratepba lendong aiben ataloker. Shitakba agibo, tamangba yimsü election nung vote angutsü atema masü saka Tsüngrem dak amangba ajanga pei taküm, kibong aser linük azükarua nübertem rongnung yimjung aser tesünep nung alitsü asoshi asütsüla. Aji oda, tamangba yimsü yabo shi temang asoshi dang masü saka tanüla kümzüktsü asoshiang tongtibangba lir, iba yagi asen taküm sür külen alitsüba lima kotak aser molumi indang sayur. Ajisüaka, tanü India nung tia majung kaji, BJP teloki India ya Hindu nung asoshi ta ayimtena yimten nung shilem agidaksütsü merangba ajanga Hindu nungertem o tanga tamangba yimsü amangertem na tsüngdak putepnüyonga meputeptettsüsa shisatsü tamajung ka enoktsür.

Atangji, Hindu nungeri India lima ya Hindu lima kümdaktsütsü merangbaji asenoki Naga lima Khristan lima kümdaktsütsü asoshi merangba den kasa dang lir. Ibai yimten tongpang masü, ibai BJP o Congress na toktepba mapa ka ta masü, saka ibai asenok Khristan-tem asoshi tanüla tongpang lir, anungji RSS aser BJP teloki bilemba amaji asenoka parnok den dener India lima ya Hindu lima kümdaktsü nungbo, asenok asoshi taküm nung Tsüngrem tsüngdang tamakok tulutibaji aji asütsü.

Aji oda, kodang asenoki BJP teloki Hindutva sentong ataloktsü asoshi inyakba aser asenoki Naga lima Khrista asoshi ta nangzükba ataloktsü asoshi inyakba na ya medemdanga bilemdangdir, idangjiang asenoki India lima nung inyaktüba tanüla wadangji tejangjaba angutsü. Atangji, asenoki Yisu Khrista asoshi inyakba o RSS aser BJP teloktemi Hindutva asoshi inyakba naji tetsüngda talangka lir. Asenoki "Naga lima Khrista asoshi" ta ayimba yimyim yabo Tsüngrem tsüngdang taaktsüka tiyazü aser anemsü yimyim lir. Reprangang, BJP teloki ayimba Hindutva yimyim mapa küma ataloktsü asoshi RSS, VHP aser BJP lenirtemi election sentong metenzükdang tamasa parnok sapuba tenla ki kati orr sarasadem (puja) mapang jungjunga agia yangji putirtem nem sarasademdaksür tenzüker aser election temer külenang kidangi maodang tenla ki tama bushir. Iba denji kodang asenok Naga lima Khrista asoshi ta ayimtener taküm yimyatem reprangdangdir, election-i aitsü atema tamasa sen aser injang prangpong den tasüa majem mapa tamajung inyaktü pur nisungtem peria bushia yumatsü. Nungdakra, itemji police gari nung police ama senzüdaksütsü aser election temerbo Khristan-a masü aser Hindu nungera memesük ta kümadoktsü. Tangarbo yimten ajungtsü asoshi tamangba yimsü bushir saka asenokbo yimten nung takok angutsü atema tamangba yimsü anema inyaker. Iba ama anemsü yimyim aser tashiyim mapatem jagi kodaser asenoki Hindutva telok den raratettsü. Iba jagi asenokang aika Hindutva sentong nung meteta aser memeteti shilem agir kümogo.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

23buba Angami Catholic Women mungdang tenzükogo



January 27, 2023 nü Zhadima yimdak Angami Catholic Women Association (ACWA) 23buba mungdang nung Mary Help of Christians, Cathedral Kohima nung putir aser ACWA Spiritual Director, Rev. Fr. Vemedo Kezo Joseph-i convention hall semzüksüdang tangokba noksa nung angur.

Kohima, Aenjeti/January 28 (TYO): Hokolbarnü Zhadima yimdak Angami Catholic Women Association (ACWA) 23buba mungdang tenzükogo; anogo asemnü mungdang ya St. Peter & Paul Church, Zhadima nung ayongzüka agir.

Iba mungdang mezüing anogo nung Southern ACWA, Northern ACWA, Chakhroma ACWA, Western ACWA aser Kohima Town ACWA kübok Angami nung yim 46 nungi tetsür 1,000 jungnüa register süa iba sentong nung denogo.

Mary Help of Christians, Cathedral Kohima nung putir aser ACWA Spiritual Director, Rev. Fr. Vemedo Kezo Joseph-i convention hall semzükja iba sentong tenzük.

Iba omen nung ajemdaker jembidang Rev. Joseph-i Catholic tsürtem dang Yisu tetsü, Mari otsü aser taküm

nung ajemdaker tayongzüka agütsü. "Kibong ka aser loktiliba yangertsü mesüra raksatsü jabiji tetsütem ket nung lir. Tetsütem dak iba ama khuret tulu lir, anungji item khuretji abentsüla aser jabiji kodanga mesamatsüla," ta pai tetsütem ayongzüka.

Kibongtem nung tetsütem atema tongtibang shilem lir, ta shia pai tetsütem dang pei chirunurtem atema tanela agi sünga aliba tetsü kaka asütsü ayongzüka.

Mungdang tetenzük sentong ya ACWA tatong Tir, Mezhünüo Alice leniba nung agi aser Sts. Peter & Paul Church Zhadima nung Catechist, Pezhachülie Philip-i salem osang aben.

SACWA nungi Vichosüle Lydwin-i Lai azüing, CACWA Tir, Neichürieno Bridget-i sentong tembanga sarasadem

aser NACWA kübok Chedema CWA choir-i ken aten.

Tanabuba sentong nung St. John the Evangelist Church Khonoma nung putir, Rev. Fr. Dr. Solomon Visosie-o Vizo-i "Mapa medeni tamangji tasü" onük jembia liasü.

Rev. Dr Solomon-i, tzü nung baptiba ajanga amangbapurtem dang Tsüngrem chirtem ta ajar, anungji mapang ajak nung tanela chiyungtsü agi mesütsüla aser Khrista den tesendaktep alitsüla, ta ayongzüka.

Paisa lokti dang tamang akatsü, tatok meshitsü aser tamang taküm alitsü ayongzüka.

Iba sentong ya ACWA Joint Secretary, Rüüngu-ü Rose leniba nung agi, CACWA General Secretary Rovikono Roseline-i Lai azüing, Kelhousano Cecilia-i sentong tembanga sarasadem aser Khonoma CWA choir-i ken tena liasü.

ANOGO ABEN TSÜNGREM DEN

Teti dena aliba

"Ajiang, Ni teti nenok den dena lir." Matt. 28:20

Asen Kibuba asenok den dena aliba meteta aliba aser memeteti aliba tepila ka koda adokdaksür! Yakobi Kibuba dena aliba metetba nung Pa taküm nung temelenshiba koda ka adok! Kodang Isak süki toktsü pai pa tebu Tsüngrem toktsüogo ta bilem. Pai ayimtenbaji tesüngmangtsü rong nung ka liasü, "Atangji Kibuba iba meta nung lir, aser aji ni memetet." Pai anepdang Tejen Lai mezüing kaket pungu nungi tekong kar ta zünger ali asübo, mesüra T.Ken 139 nungi tekong kar ta zünger ali asübo, pa lemang nung kecha shisabulu mesüi lila! Tesülen ango tulu pokia pa Kibuba nungi piladaksütsü makok ta pai bushiteta Tsüngrem tenüing sanga liasü! Paul o bendanger matsüngdang noktadang Kibuba pa den dena aliba metetta anisüngzüka liasü!- "Ni mezüing kü temeten ashidang kü den noktaker nisung shinga mali asü, ajak ni toktsü: iba taiji parnok nem magütsütsü: ni Tsüngrem dang sarasadem. Aji saka Kibuba den noktaker aser Pai ni tashi itdaksü."

Tanga lokti nung atangji Kibuba atenba koda liasü. Kibuba atenba ajak den adener. Pai kar nem dang maongka agüja Pa matener. Ajemalurtemi teti Pa atenba metetta alir.

17th Century surochioker, Lawrence-i Kibuba adenba kuli yamai agütsü: "Ni asoshi mapa inyakba mapang aser sarasademba mapang tepila mali: chipo-aunpo shidokba ola, aser kasa mapang nung kari nungdak balaka asoshi ajadang ni apudaka sarasadem ama ajak nung Tsüngremi ni süneptsür ama agir. Ni mapa inyakba mapang ajak ola madoki kü nüla Kibuba den sensaksema alir, koba agi teti kü mulung nung tepela adokdaksür. Kibuba den teti sensaksema aliba nung tamang aser tepela aliba tetka alima nung tanga tepela mali. Saka tepela tanang angutsü nükjidong ya inyaksü ni majungshir; saka asenoki ibai temeim ozüing agi, aser Tsüngremi asenok agizüksü ta inyakdi!"

O Tamangertem, temeimba Tebui Kalvary nung mejembitetba senti talangzüka mapa, aser tanela Temeshi tamanger dak aliba ajanga Pa tsüngdang temeshi kümdaksüba iba ochi mapa bilemdangang, iba ochi Tsüngremi asenok anogo shia Pa den telungjem nung sotta ayur. Asenoki anogo shia sarasadem aser lai bushiba mapang agir, aser asen temulungjang tamajung bilemba ajak indoker, aser mulungjang ajak agi Tsüngrem meimtsü mulungtetra, asenoki Tsüngrem den telungjem akaba angateta akümtsü, aser mejembitetba tepela agi pelaa alitsü.

Lungpak ka nung David chuba tenüing ajenloker aliba ngutetogo

January 28, 2023: Küm 2,900 tejaklen 'basalt' lungpak ka nung David Chuba tenüing ajenloker aliba ngutetogo, ta Biblical Archaeology Review ajanga metetdaksü.

Iba research kübok 'Mesha Stele' mesüra 'Moabite Stone' ta ajaba lungpak bushisüngdanga liasü; iba lungpak ya 1868 küm ngutet aser 1869 küm raksa. Lungpak tera raksabaji ajanga idakji ajenloka aliba ajakji junga mezüingteteti liasü, ajisüaka lungpakji meraksadang paper kati iba lungpak nung menünga ajenzüker liasü, ibayongji iba lungpak nung aliba otemji junga agizüktet, ta Biblical Archaeology Society-i metetdaksü.

Iba lungpakji Aso 9buba B.C mapang aser Moab nungi Mesha Chubai takok balala anguba putipuyang mapangtem nung liasü. Iba lungpak nungji 2 Chubatem 3 nung Moab-i Israel aser Judah anema raraba tatalokba dak sendakba zülua lir. Biblical Archaeology



Review dak sendakba Winter 2022 edition zülur ana- André Lemaire aser Jean-Philippe Delorme nati, technology ajanga Mesha Stele (lungpak) nungji David dak nungi jakzükbatem indang shia lir, ta metetdaksü.

"2015 küm nung University of Southern California kübok West Semitic Research Project-i iba lungpak aser paper noksa naji digital ajanga

tangoka liasü. Parnoki Reflectance Transformation Imaging (RTI) ajanga tip balala nungi digital noksa aika tangoka liasü. Iba method ya kanga junger, kechiyong digital noksa tangokba ajanga research agirtemi nungo oset tejentem nung miima alibatem tejangjaba kümdaksür," ta tenati metetdaksü.

"2018 küm Louvre Museum-ia iba lungpak menüingzüka paper ji high-resolution ajanga noksa tangoka liasü, aser ibaji ajanga küm 150 tain paper nungji tesangwa yaloktsüba ajanga akhidang ajenlokba otemji kanga tejangjaba kümdaksü," ta tenatisa metetdaksü.

Iba technology tasenbaji ajanga Lemaire aser Delorme nati tamalen mezüingteteti aliba olong asem züngteteti liasü.

"Iba lungpak nungji David dak nungi jakzükertemji Judah yimsüsürtem ta shia lir, koba ajanga David Chubaji akhidang nungtugu asüba jangjatsür," ta kasa research ajanga metetdaksü.

Sudan nung pastor ka den Khristan asem khaset

Nairobi (Kenya), January 27 (Agencies): Hombarnü (January 23, 2023) Sudan nung Islamic kiralongrartemi pastor ka den Khristan asem khasetogo. Sudan kübok South Kordofan state yimtiba, Kadugli nung Khristan ministry team ka ki ka nung anenzüka lia kiralongrartemi injang khaloktsüba ajanga pastor den Khristan asem asü aser tangar pezü yiru.

Sudanese-American Pastor, Ibrahim Kandri den külemi Ismail Osman, Bashir Almaak aser Ayoub Ibrahim nung Um Durein-i kidangi meyipa arudang January 22 aonung Kadugli jila nung anenzük aser January 23 anepdang 3:00-4:00 ako tsüingda kiralongrartemi parnok khaset, ta Arogo lenir kati metetdaksü.

2011 küm nungi tenzuka iba area nungiji Islamic kiralongrartemi nüburtem amokmerena arur. Khristan ministry team züngsemtem iba aonung jila nung anenzükbaji parnoki metet asütsüa akok, ta Arogo lenir kati metetdaksü.

Kiralongrartemi amakdang yirurtemji Imtiyas Marhy

Jabdool, Fadul Musa Al Haraba, Zakaria Butros Al Haraba aser Mujahid Hassan nung lir.

Pastor den Khristan asem tasü mangji aremtsü atema Khartoum-i bener oa liasü.

Sudan kübok South Darfur Province nunga January 8 nü Khristan ana pua liasü. Khristan ana jagi Islam yimsü toktsür Khristan yimsü agizükba agi apu saka kasa anogo nungji isa chioka liasü.

2019 küm Sudan nung Omar al-Bashir yimsüsüba anenba sülen nungi linük nung tamangba yimsü temeden jenjang tajungba aküm, ajisüaka 2021 küm October 25 nü sepaitemi sorkar atsüingdokba sülen nungi ano Khristantem reshikangshi tenzükogo.

Sudan nung Khristan nütsüing million 2 shi lir. Tetezü linük nung nütsüing million 43 nungi Khristan nütsüingji shilem 4.5 shi dang lir.

Tang alima nung Khristantem alitsü tamajungtiba linük 50 rongnung Sudan linük ya jenjang 10buba nung lir (Open Doors' 2023 World Watch List).

**AO OSHI ANGAZÜKDAK:
TANÜ ANGAZÜKTSÜBA OJANG**



Oro

- (n) telok arur tsük chitsüba ozü tapu ka (parrot)
- * Alu nung oro marutsü atema sü yimzüa yutsür.

Orong

- (n) terep temerang agi meyipanga aliba shiuru tila (type of beetle)
- * Orongi zü lanu achir.

OLONG PAITEP # 6412

1		2				3		4	
						5			
6				7		8			
								9	
	10			11					
12									13
				14				15	
16									
						17			

TIPIEN

- 1. Taret - (6)
- 5. Sentilung / Senti oset - (5)
- 6. S ___ dong - (3)
- 7. Ninang tulu ka - (4)
- 9. Alima nungi pila - (3)
- 10. Nüngdak mali - (9)
- 12. Mejangba yimdangi aru - (3)
- 14. Ya sürbo / Iba sülen - (4)
- 15. Ta ___ r - (3)
- 16. Magima - (5)
- 17. Tasü maiti tsübu - (6)

LANGTSÜNGLEN

- 1. Rongsen akar - (5)
- 2. Ajungben - (7)
- 3. Tapok - (4)
- 4. Kou mali - (6)
- 8. Shitak masü - (3)
- 9. Tebenjem tebur - (7)
- 10. Kenpiga pila orr - (6)
- 11. Tanur alimai aru - (3)
- 13. Iba küm - (5)
- 14. A ___ a - (4)

OLONG PAITEP # 6411 TELANGZÜBA


TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kioktsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

Noksa nung meputepi aliba 10 bushiang



NAI-A YA METETTER MA



182 m STATUE OF UNITY, INDIA
 128 m SPRING TEMPLE BUDDHA, CHINA
 108 m GUANYIN OF NANSHAN, CHINA
 93 m STATUE OF LIBERTY, US
 91 m THE MOTHERLAND CALLS, RUSSIA
 38 m CHRIST THE REDEEMER, BRAZIL

Yangi Sardar Patel kürakyanglu "Statue of Unity" noksa nung angur. Iba kürakyanglu ya 182 metres (597 ft) talang, Gujarat nung lir aser ibaya alima nung kürakyanglu rongnung talangtiba asütsü.



Mrs International Global World Finale 2023 nung Assam tsür ana Tarali Sarmah aser Sumi Choudhury Das nati takok nguogo. Iba tetoktepbba nung Tarali-i Mrs Photogenic aser Sumi-i Mrs Glamorous awards ngua liasü. Iba sentong ya Mrs International Global (MIG) ajanga Malaysia yimtiba Kuala Lumpur nung ayonga among. Anogo pungunü International sentong ya January 9 nungi 13 tashi among aser India, Mexico, Japan, Vietnam, Ukraine, Philippines, Korea, Malaysia, Singapore, Latin USA, Sri Lanka, Botswana o China amala linüktem nungi tetokteper 23 liasü.

Congress-i Meghalaya election atema candidates metetdaksür

Shillong, January 28, 2023

(Agencies): Congress indang Central Election Committee-i Meghalaya assembly election atema candidate 5 metetdaksüogo.

Jhanika Siangshai-i 6 Khliehriat (ST), Arbiangkam Khar Sohmat-i Amlarem (ST), Chirend Peter R. Mark-i Kharkutta (ST), Dr Tweel K. Marak-i Resubelpara (ST) aser Carla R. Sanfma-i Rajabala nungi tokteptsü, ta Central Committee-i ashi.

Külen, Meghalaya nungi Bharatiya Janata Party (BJP)-i ashiba agi opposition Congress-i menden 4 dak tema nung takok mengutettsü.

"Meghalaya nung Congress-i menden 3-4 nung dang takok angutsü" ta BJP national vice president aser state in charge

Chuba Ao-i ashi.

Iba atema Congress-i Chuba Ao dang Congress telok atema masü saka par party atema bilema inyangka ta o meyiptsü.

"BJP ya terata lennirtem indang terata party ka lir" ta Congress-i metetdaksü.

"BJP-i tesüiba elections nungi angazüktsüla aser ibaji Constitution indang secular principles aser Preamble akhümstübuttsüba lir. Par züngsemtemi secularism anema inyangsangshiba aser lokti nung telemsa adokdaksüba azüoktsüla" ta Congress-isa ashi.

"Chuba Ao-i par party ajanga takok angutsü ashir saka ibaji BJP State President Ernest Mawrie-i ashiba den meputep lir. Meghalaya nung BJP ya terata ka nung lir ama ajiteter.

Iba ajanga BJP ya terata lennirtem indang terata party ka lir" ta Shillong City Congress Committee president Dr Omarlin Kyndiah-i ashi.

Külen, NPP national president aser Meghalaya Chief Minister Conrad Sangma-ibo par party-i taruba election nung single majority angutsü aser iba ya küm 30 nung tang mezüing atema ataloker asütsü ta metetdaksüogo.

"1972 nung All Party Hill Leaders Conference (AHL)-i otsü yangluba ama NPP-i kasa otsü yanglutsü imlar" ta pai ashi.

"NPP-i teküpoktiba jenjang nung alirtem dang nungi osang tajung angashir aser onoki nübortem den tesüiba küm 5 tsüingda mapa inyangka indang jembir" ta Chief Minister Conrad Sangma-isa ashi.

Tripura assembly election nung BJP-IPFT yariteptsü

Agartala, January 28, 2023

(Agencies): Tripura state assembly election nung Bharatiya Janata Party (BJP) Tripura state unit-i IPFT den loktepbba osang metetdaksüogo.

"Tripura BJP-i 2018 assembly elections nungi IPFT den tesentaktep liasü aser onoki state nung alirtem asoshi maparen ajak inyangkogo" ta Tripura Chief Minister Dr Manik Saha-i ashi.

"BJP-i political party mashi ka den tesentaktep yangluba sülen mepilar, ajisüaka mapang

kar nung tanga party temi onok toktsüba ajuruogo" ta pai ashi.

2023 assembly election nung IPFT-i ST reserve constituency 5 nung tokteptsü.

IPFT lennir NC Debbarma'er jala Jayanti Debbarma-i Asharambari constituency nungi tokteptsü.

Bharatiya Janata Party (BJP)-i January 28 nü Tripura Assembly election atema candidate kar metetdaksüogo.

"Tanü menden 48 nung candidate tem metetdaksüogo. Tanüingba menden 12 indang

yakta metetdaksütsü" ta BJP spokesperson Sambit Patra-i ashi.

"Tripura Chief Minister Manik Saha-i Town Bordowali constituency nungi tokteptsü" ta Patra-isa ashi.

"Külen Deputy Chief Minister Jishnu Debbarma-i Charilam constituency aser MP & MoS Pratima Bhoumik-i Dhanpur constituency nungi tokteptsü" ta paisa shisem.

BJP candidate 48 nungi tetsür 11 lir, ta Patra-i metetdaksü.

Manipur nung World War II bomb raksaa endok

Imphal, January 28, 2023

(Agencies): Honibarnü Manipur nung police-i World War II vintage bomb ka raksaa endokogo.

Bomb tem ya Manipur kübok Thoubal district nung anguba liasü. Honibar nikongdang 1:30 ako meta Waithou Chiru nung alu ka nung bomb tem anguba raksaa endok, ta police-i ashi.

Arishi küm 45 tain aluyimer M Ajit Meitei-i par alu nung Hokolbarnü bomb tem tutet.

Pai iba osang ya sangoktsüba sülen Lilong police station nungi police telok ka iba tesem tonga ao aser bomb temji bendena liasü. Iba sülen Honibarnü Manipur police bomb detective aser disposal squad ajanga Waithou Chirubi nung bomb tem

raksaa endok.

World War II mapang Northeast nung tongpang aika raraogo. Japanese sepaitemi British India amakdang Manipur aser Nagaland tonga arua raraa liasü.

Tesüiba kümtem Manipur aser Nagaland nung WW-II tapoktsütem aser tanga osettem nguyonga arur.

MULUNGNEN O

"Tetsür Aikati Mapa Tajung Inyakogo, Saka Parnok Ajakji Nai Ajatetogo."
Apijemtsü Shin 31:29



LATE. LOLENPENLA

4th August 1976 - 24th January 2023

Onok LT.LOLENPENLA'ER kinungertemi la shiranga alidang aser la iba lima nungi pilaa aoba mapang onok dang kanga meima yariteper tembar-medemertem, kidang-kiyongertem, arogo aser lokti tentet balala aser temeimertem ajak dang onoki kanga pelaba mulungnen o ka yangi metetdaksür.

Tulusang Tsüngremi nenok ajak talubosa moajang ta onoki sarasademtsür.

- Temeim Kinungbo & Kinungertem.

MEYIPTSÜR

Aenjeti (January) 28, 2023 anogo koba Kelingmen yim nungi nisung kari Shri Imnatiba toktsür Shri Nuklutoshi den adener ta sangdongogo, ibaji NDPP Arkakong Kelingmen Unit ajanga yamai meyiptsür:

Shri Imnatiba meyaritsü lemteter rongnung 42 (lir ana) bo 2018 küm Nuklutoshi yarirtem lir anungji item nisungtem jagi kodanga Shri Imnatiba, NDPP yaria maru. Meyiper Ruling Government temoatsü ang agia parnok küm pungu lia aruogo. Anungji tang election atongtsü mapang kodanga yaria marudangba tetemjen lenir ka meyaritsü ta sangdongbaji khenyongi tagidak makaba o lir aser khukhua aitsür. Arkakong Constituency nungi candidate Shri Imnatiba nongita yaritsü NDPP Kelingmen Unit akangkanga dang lir.

Tenüing adoka alir rongnung tick mark agüja alirtem (Sl. No. 1,2,3,4,5,19,24,25) ya dang NDPP züngsem liasü:

KELINGMEN VILLAGE
This is to notify that these are the party workers from Kelingmen Village who had supported the NDPP Candidate Shri. Imnatiba in the 2018 Elections. Going forward they are pledging their allegiance to support Shri. Nuklutoshi for the upcoming 2023 State Legislative Elections under the 22nd Arkakong Constituency, Mokokchung District.

1. Moatoshi Jamir	- Secretary NDPP 22nd Arkakong A/C
2. Nungangmanent	- Executive NDPP Kelingmen Unit
3. Sunjenmeren	- Executive NDPP Kelingmen Unit
4. Jimakumzuk	- Executive NDPP Kelingmen Unit
5. Supongnukshi	- Executive NDPP Kelingmen Unit
6. Imkongakum	
7. Lanutoshi	
8. Imkongnungla	
9. Rongsenwati	
10. Chubanungsang	
11. Imtichuba	
12. Lanutola	
13. Meyilemia	
14. Moanaro	
15. T. Chubasanent Jamir	
16. Imnatola	
17. Maongkaha	
18. Imtinenla	
19. Bendangtoshi	
20. Temjenchuba	
21. Moamongla	
22. Arenbenia	
23. Imtisongla	
24. Aoyangla	
25. Temjenmoa	
26. Imjikokla	
27. Limatenzuk	
28. Pangeronen	
29. J. Imsuwati	
30. Aokumzuk	
31. Imsutoshi	
32. Lipokmar	
33. Imnaenia	
34. I. Yanglu	
35. P. Alemla	
36. Temjenrenba	
37. Imsungilla	
38. Imnukungba	
39. Rendipokla	
40. Imilten	
41. Talizungla	
42. Tiasenia	
43. Bendangnukshi	
44. Maong Jamir	
45. Odiangshi	
46. Ardangsen	
47. Talikaba	
48. Pursangla	
49. Nuktenzungba	
50. Bendangmenla	

I. Aren Ltr

President

22 Arkakong A/C, Kilengmen Unit

US-i Ukraine nem tank agütsüba North Korea-i aitsüogo

Pyongyang, Aenjeti/January 28 (Agencies):

Russia nunger agütsütsü atema Ukraine nem advanced battle tank tem agütsütsü telemtetba agiba atema North Korea lenir Kim Jong Un adianu Kim Yo Jong-i United States aitsüogo aser ashiba agi, Washington-i "red line" ka ajangogo aser Moscow raksatsütsü atema tasa asaba "proxy war" ya tali tamajungba küm daksür.

Kim Yo Jong-i Hokolbarnü iba olen lemstepba ajanga Ukraine rara dak sendakba nung Russia aser North Korea na tesendaktep tali akangshiba sayur.

"Ukraine nem rara dang amshiba hadir balala agüja US-i rara tamajungba küm daksüba atema kanga süoki ia bilemba lemsateper," ta Kim Yo Jong-i ashi.

"US ya ozüing raksar ka lir, shirnoki Russia nunger security amokmerener aser tetsükdatsü agütsür aser iba tesem nung tensa tamajungba küm daksür," ta Kim-i ashi shiba Workers Party of Korea, Central Committee vice-department director lir.

"US aser anüolen aliba linüktemi agütsüba military hardware tem ya Russia nunger army aser nüburtemi anüksa rongtoktsütsü," ta lai ashiba den North Korea teti Russia den

nokdaksü ta ashi. US-i Ukraine nem M1 Abrams tanks 31 agütsütsü ta sangdongba sülen Kim-i iba olen lemsatepa liasü. Germany-i parnok ket nung aliba Leopard 2 A6 tanks 14 Ukraine nem agütsütsü telemtetba agiba sülen US-ia iba osang sangdonga liasü.

Ukraine nung mepetmesü tulu adokba ya North Korea-i US dak tai tongloktüsügo aser ashiba agi, anüolen aliba linüktem police ajanga Russia-i parnok security tejangraba kümzüka ayutsü asoshi iba jenjang agitsüsa aküm.

Russia aser Syria na dak alaka North Korea-i dang Donetsk aser Luhansk nüjiso anguba agizüka lir. Donetsk aser Luhansk ya Ukraine anütoklen Russia-i teyari agütsüba tesem ana lir aser iba tesem yagi mapa inyakertem yoktsü tebilemba aliba NK-i lemsatepogo.

Kasa mapang nung Russia nem artillery shell aser tanga injangtem agütsür ta shia US-i North Korea aitsüogo, ajisüaka North Korea-i iba taitüsüba ya magizüki arudar.

Pyongyang-isa, prangbong hadir balala takaratiba nung yanglu tenzüko go aser parnoki 2022 küm missile 70 dak tema tendangogo, kong nuclear-capable intercontinental ballistic missile densema liasü.

Peru Congress-i tir election takaraba agitsü mepeshiba magizük



Dina Boluarte

Lima, Aenjeti/January 28 (Agencies):

Peru tir Dina Boluarte-i election 2023 küm December ita agitsü mepeshiba Congress-i magizük. Longkak aitertemi la anema nokdangba mapang tang iba jenjang agiogo.

Ozüing yanglurtemi taoba ita, 2026 küm agitsü aliba election ya 2024 küm April ita agitsü atema mulungtepa liasü. Ajisüaka Honibarnü plenary session ka agiba mapang election takartiba nung agitsü benokba Congress-i magizüki liasü. MP tem rongnung parnok 45-i ken o pusema vote agütsür 65-i iba anema vote agüja liasü.

Left-wing party temi election jelia agiba den temzüing ozüing meleshitsü atema takhangba agütsü, koba longkak aiter kari mapang shia khanga arudar.

"Iba vote agiba sülen jelia election agitsü atema benokba magizüker," ta Congress tir Jose Williams-i, ghonda tenet dak tema sensak asemba sülen ashi.

Vote agitepba sülen ken o ya tanaben asadangshitsü atema Williams-i temepeshiba ka agizükogo, koba Hombarnü session tasen ka nung sensak asemtsü akok, ajisüaka iba telemtetba ya melenshitsü tasak asütsü.

Iba South American linük nung December 7 nü nungi tenzüka anogoshi amai nüburtemi longkak aita tang yimden yimsüsüba nung mepetmesü tulu adoker lir. Taoba tir Pedro Castillo-i congress loksatsütsü merangba aser ozüing kübok yimsü asütsü merangba atema pa apuba sülen

iba mepetmesü tenzüko go.

Longkak aitertemi Boluarte mapa nungi agitsü aser Congress loksaba sülen tangsa tang election agitsü aser temzüing ozüing tasen yanglutsü khanga arudar.

"Ni tir mapa maneni abentsü atema kecha tejangraba mali. Ni temzüing ozüing kübok kü khuret abentsü atema idaki lir," ta Boluarte-i ashi.

Castillo Congress-i mapa nungi agina apuba sülen vice president ama Boluarte ya temzüing ozüing kübok tir mendeni atu.

Boluarte mapa nungi anentsü aser election agishitsü khanga longkak aitertemi highway tem nokdangogo aser iba ajanga chiyongtsü, totzü aser tanga tenüingdakba osettem agi kanga anüingdar. Longkak aitertem ya timba Castillo pusemertem lir.

Taoba tir apuba sülen hopta tenet tashi longkak aiba mapang nisung 47 tepsetatokogo, ta Ombudsman Office of Peru sangdong ka ajanga metetdaksü.

Autonomous human rights office yagi ashiba agi, kinü tanur ana densema civilian 10 lenmang nokdang aliba ajanga medical treatment aser mozü mapang shidak nung magiteti süogo.

Aryna Sabalenka-i Australian Open 2023 kokogo



Aenjeti/January 28, 2023

(Agencies): Honibarnü Australian Open tetsür kija asaya final nung Belarus tsür fifth seed asayar Aryna Sabalenka-i kanga meranga asayar Elena Rybakina madak takok nguogo.

Lai tang mezüngbuba Grand Slam kija asaya final ka koktetogo.

Final asaya nung asayar anapronglai tena tashi sayua kanga toktepa asayaba sülen arishi küm 24 tain Sabalenka-i 4-6 6-3 6-4 agi koka liasü.

Sabalenka, shiba Belarus-i Ukraine rara nung Russia pusemba atema neutral flag ka kübok asaya liasü, lai asaya nung winners 51 nguteta asayaogo.

Kasa mapang nung Kazakhstan tsür Rybakina-i

Wimbledon kabo koka lir aser taküm Australia Open koka tanabuba Grand Slam akoktsü timla nung asaya ajisüaka tiamaka lai final asaya mekoktet.

Asaya nung Sabalenka-i mezüngbuba championship points asem anguba maongka magiteti liasü, saka lai süngjemshir asaya break point ka kümzüka liasü.

Asaya akoktsü asoshi pezübenbuba maongka anguba mapang lai alizüng tongteta liasü.

Asaya akokba sülen lar team den jembiba mapang Sabalenka-i, "asenok taoba küm tetsükdaktsü aika ajangshio. Asenoki kanga meranga inyakogo aser iba trophy angutsü nenok langa lir," ta lai ashi.

"Nenoki kü atema inyaktsüba ajanga atema kanga pelar," ta laisa ashi.

WTA Tour nung ball kanga tashi agi azükba asayar ana final asaya asünung kanga toktepa asayatsü imla liasü aser yamaji asayatetogo.

Service kanga ajanga otetba ajanga Rybakina-i takok tajung nguteta arudar. Tetsür kija asaya nung lai ace timtiba oteta lir aser final tashi nung lai la indang service games shilem 84 kokteta liasü. Final asaya nung mezüngbuba set nung lai la indang service points trok dang mekoki liasü.

Kasa mapang nung Sabalenka-i taküm küm tenzüker asaya 10 atonga kokogo. Lai Australia Open masaya tsüngda Adelaide nunga asayamung ka kokogo.

2024 Copa America United States of America nung asayatsü

Aenjeti/January 28, 2023

(Agencies): South America nung asayamung tulutiba Copa America, 2024 küm United States nung asayatsü. Iba asayamung nung South America indang CONMEBOL nungi team 10 aser CONCACAF region nungi team trok tokteptsü.

CONCACAF, the confederation for North and Central America and the Caribbean-i ashiba agi, iba asayamung ya lokti tentet ana ya longjemer ayongzüka asayatsü.

North aser South American confederations na tsüngda tawa sentong balala longjemer inyaka aruba nung iba osang sangdongba ya shilem ka lir.

United States, Mexico aser Canada nung longjemer 2026 World Cup ayongzüka asayatsü lir aser Copa America ya iba asayamung ayongzüka asayatsü aliba atema terenemshiba tajung ka

asütsü.

Maneni iba asayamung nung shilem agiba ajanga WC ayongzüka asayaba linük asem shirnok automatically qualify asür parnok team tanga den toktepa asayatsü atema maongka agütsütsü. 2026 küm World Cup nungbo team 48 asayatsü.

United States nung taoba mapang 2016 küm centenary Copa America ayongzüka asayaogo, kong CONCACAF team temia shilem agia liasü.

CONCACAF national team trok Copa America atema 2023/24 CONCACAF Nations League competition nung qualify süogo.

2024 Copa America ya Ecuador nung ayongzüka asayatsü imla liasü, saka parnoki iba asayamung ayongzüka masayatsü atema telemtetba agia liasü.

Kasa mapang nung CONCACAF-i ashiba agi, 2024 küm parnoki Final Four'

style tetoktepa ka ayongzüka asayatsü, kong tesem ana nungi temaba jenjang nung aliba club pezü asayatsü.

Confederation shia nungi club anana ya CONMEBOL aser CONCACAF club tetoktepa ajanga qualify asütsü.

Kasa mapang nung tetsür football asaya nunga CONCACAF-i South America nungi team tajungtiba pezü 2024 küm CONCACAF W Gold Cup tasenba nung shilem agitsü atema jaoker.

Iba asayamung ya United States nung asayatsü, kong Brazil, Colombia, Argentina aser Paraguay-i shilem agitsü.

"CONCACAF aser CONMEBOL nung tang tetsür aser tebur football asaya renlokyonga oya aliba yaritsü atema iba telongjem yanglur aser iba ajanga Confederations anaprongla ajangzüksü," ta CONCACAF tir Victor Montagliani-i ashi.

India nunger Wrestlers 8

Zagreb Open nung masayatsü

New Delhi, Aenjeti/January 28

(Agencies): Vinesh Phogat aser Bajrang Punia na densema India nunger wrestler ti-i Zagreb Open nung masayatsü telemtetba agiogo. Parnoki ashiba agi, iba asayamung nung tokteptsü atema parnok renema mali. Kasa mapang nung Anju yiruba ajanga iba asayamung nung masayatetsüsa kümogo.

Mary Kom-i aniba oversight committee, shirnoki WFI achaayangdar, iba committee yagi Bodhbarnü February 1 nü nungi Croatia yimtiba nung asayatsü aliba iba UWW Ranking Series atema züngsem 36 agi kümtepa Indian squad sangdonga liasü.

Wrestler tem shirnoki Jantar Mantar nung anogo asem tashi longkak aitba mapang, Wrestling Federation of India (WFI) meloksatsü tashi aser WFI tekolakba mapa nungi magin tashi parnok national aser international asayamung kecha nunga shilem magitsü ta shiogo, parnoki team sangdongba anogosa iba asayamung nung shilem magitsü telemtetba agiba metetdakja liasü.

Vinesh (53kg) aser Bajrang (65kg) na den külemi Tokyo Olympics silver medallist Ravi Dahiya (57kg), world championship medallist Deepak Punia (86kg), Anshu Malik (57kg), Bajrang kinungtsü Sangeeta Phogat (62kg), Sarita Mor (59kg) aser Jitendra Kinha

(79kg), nunger ajaki iba asayamung nung shilem magitetsü ta shiogo.

"Parnok iba asayamung nung shilem agitsüsa noklang nung noklang renema mali ta shiogo. Parnok India team nung züngoksemba sülen odang asayatsü asü. Iba ya kanga jungabo magizüktsü," ta SAI source kati PTI dang ashi.

India nunger wrestler tem atema iba ya2023 season asoshi mezüngbuba asayamung lir, kong Asian Games aser 2024 Paris Olympics Qualifiers densema lir.

Wrestler tem shirnoki asayamung atongtsülia longkak aitba nung shilem agiogo, parnok junga training magiteti liasü aser ibayongji asayamung nung junga shilem magitetla.

Sorkari WFI tir Brij Bhushan Sharan Singh dang mapa nungi atsüngina atatsü atema tetuyuba agütsüba sülen wrestler temi longkak aitba anenogo.

Iba sülen sorkari, ken o bushisüngdang mesüzük tashi WFI inyakim achaayanga atatsü asoshi züngsem pongu agi kümtepa oversight committee ka tentettsüogo, ajisüaka iba committee metetet tsüngda parnok den tongtepretepe masüba atema wrestler tem melapar.

Wrestler temi parnoki mulungba nisung ka iba committee nung dendaktsünüa liasü. Iba committee yagi ita ka tsüngda parnoki ngutetba osang agütsütsü.

Newcastle-i Everton forward Gordon alizüktsü mulunga agizükogo

Aenjeti/January 28, 2023

(Agencies): Newcastle United-i pound 45 yong Everton nungi asayar Anthony Gordon alizüktsü mulunga agizükba sülen pa den tenangzüktepba ka yanglutsü ana nung lir.

Gordon ya hopta ka shi masaya lir, Hokolbarnü nungi Everton indang Finch Farm training headquarters-i meyipa aruogo.

Mongolbarnü January transfer window meshibang tsüngda arishi küm 21 tain forward den tenangzüktepba ka tembanga renemtsü imlar.

Pa alizükba taaji pound 40 asütsü aser iba sülen add-ons densema pound 45 shi asütsü.

Midfielder Gordon ya summer nung Chelsea puria alizüktsü liasü saka Everton-i pa atema pound 60 meshiba ajanga malizüktsü, ajisüaka tangbo parnoki pa ayoktsü atema telemtetba agiogo.

Frank Lampard melena manager tasenba Sean Dyche shimba sülen pa nema Gordon alizüktsü taa ya shilem ka agütsütsü imlar.

Gordon ya Everton nungi anitetba asayar ka lir. Pa 2020 küm nungi asaya tenzüka sülen tang tashi nung asaya 65 nung goal tenet idakja lir.

Boxing Day nung Wolves pur kidang makokba sülen pa tang tashi nung asaya ka nunga danga tetenzük nungi asaya mali aser pai tatemsa October 22 nü Crystal Palace goal 3-0 agi akokba asaya nung goal ka idaktsür lir, koba Everton pur atema tatembangbuba takok liasü.

Kasa mapang nung defender Kieran Trippier den tenangzüktepba tasen ka yangluba indang Newcastle-i sangdongogo.

England nunger full-back ya 2021 küm January ita pound 12 yong Atletico Madrid nungi Newcastle nung arua adenba mapang 2023-24 season tatem tashi asayatsü atema tenangzüktepba ka yanglua liasü.

Tenangzüktepba tasen yanglushiba sülen arishi küm 32 tain asayar ya Newcastle United nungi 2025 küm tashi asayatsü.

BILEMDANGANG

"Nü mapa agi tangar ajungmesoang."